

## Prikaz *Genocid nad Bošnjacima, Srebrenica 1995-2020: Uzroci, razmjere i posljedice* (Zbornik radova)

Međunarodna naučna konferencija pod nazivom *Genocid nad Bošnjacima, Srebrenica 1995-2020*, je održana 19. oktobra 2020. godine u Sarajevu. Godinu dana kasnije u saradnji Institut za istraživanje zločina protiv čovječnosti i međunarodnog prava Univerziteta u Sarajevu, Univerzitet u Sarajevu, Univerzitet u Tuzli i Institut za historiju Univerziteta u Sarajevu su izdali zbornik radova sa ove Međunarodne naučne konferencije pod nazivom: *Genocid nad Bošnjacima, Srebrenica 1995-2020: Uzroci, razmjere i posljedice*. Zbornik radova sastoji se od dva toma, te predstavlja do sada najveći skup radova vezanih za događanja u Srebrenici i Bosni i Hercegovini 1995. godine. Međutim, uprkos tome što su u naslovu naznačeni uzroci, razmjere i posljedice, u radovima koji se nalaze u ovom zborniku je moguće pronaći mnogo više historijskih konstanti. Shodno tome, unutar dva toma ovog zbornika, radovi su podijeljeni u šest zasebnih cijelina, a to su: 1. *Uvodne rasprave o genocidu nad Bošnjacima*, 2. *Međunarodnopravne analize*, 3. *Historijske analize događaja i zločina 1992-1995.*, 4. *Revizionizam i negiranje genocida*, 5. *Društveno-političke posljedice genocida* i 6. *Metodološke rasprave, osvrti i prikazi*.

Prvo poglavlje predstavlja uvod u raspravu o genocidu nad Bošnjacima, te se u radovima Rusmira Mahmutćehajića, Arne Johan Vetlesena i Dželala Ibrakovića pravi uvodna smjernica za dalje rasprave o genocidu i problematici koja okružuje isti. Uvodni dio oslikava osnovne konture problematike i otvara pretpostavke za širu, multiperspektivnu bazu propitivanja svih onih kategorija koje se vežu za fenomen genocida, a o kojima će biti govora u kasnijim poglavljima. U drugom poglavlju *Međunarodnopravne analize* nalazi se šest radova sljedećih autora: Enis Omerović, Sakib Softić, Zijad Hasić, Zijad Bećirović, Alija Kožljak i Hoda Dedić. Unutar ovih radova obrađene su konvencije o sprečavanju i kažnjavanju zločina genocida, kao i teme koje se bave zaštitom civila unutar međunarodne politike i prava. Posebno su analizirane odluke i stavovi Vijeća sigurnosti Ujedinjenih Nacija o genocidu u Srebrenici, kao i rezolucije koje su donesene od strane Evropskog parlamenta i drugih međunarodnih akata. Prvi tom ovog zbornika završava sa poglavljem *Historijske analize događaja i zločina 1992-1995*. Unutar ovog poglavlja nalazi se šest radova, a autori su: Merisa Karović-Babić, Adib Đozić, Zilha Mastalić-Košuta, Mujo Begić, Alma Hajrić-Čaušević i Almir Grabovica, te Emrah Đozić. U ovom poglavlju predstavljene su analize koje se tiču Rezolucije 819, zločini nad djecom u BiH na primjerima Sarajeva, Mostara i Srebrenice, kao i vjerski život u Srebrenici i Žepi tokom

agresije na Bosnu i Hercegovinu. U drugom tomu nalaze se preostala tri poglavlja, a to su: *Revizionizam i negiranje genocida*, gdje se nalaze radovi: Mirka Pejanovića, Nevenke Tromp, Zijada Šehića, Esada Bajtala, Muamera Džananovića, Hikmeta Karačića, Denisa Bećirovića, Ermina Kuke, Hamze Memiševića i Alena Borića. Unutar ove teme se obrađuju različite percepcije genocida u Srebrenici, te se govori o različitim narativima kada je u pitanju negiranje samog genocida u različitim sferama života. U petom poglavlju obrađuju se „Društveno-političke posljedice genocida“, a unutar tog poglavlja nalazi se čak deset autora koji navode različite posljedice unutar društveno-političke slike moderne Bosne i Hercegovine. Posljednje poglavlje donosi osvrt i prikaze, te metodološke rasprave vezane za istraživanje genocida nad Bošnjacima u Srebrenici 1995. godine, te se u njemu nalazi šest radova.

Muhamed Bogilović